

光緒重修天津府志

重修天津府志卷四十二

傳四

人物二

歷朝

目錄
卓敬明

甄實

王恭

崔琰

崔瑛

張景亮

王翺

馬昂

胡欽

趙昇

李瑄
弟瑋

李琚

李鉉

王珣

傅愷

冀本

孫昂

劉夔

孟虎

強珍

于鑑

王界

馬思聰

蕭英

曹孜

徐廷錫

張璿

張希達

馬政

蔣儀

張時敘

鄭海

張淮

張進德

張佑

鄭氣

張偉

楊應時

王紳

王國寶

姪緒

張問之

陳耀

張愚

卽張遇

李法

楊文卿

趙潤

汪來

劉燾

陳松

湯殷

湯賓

曹梅

戴才

鄭金

張謨

張謐

張簡

殷尙質

戴佩

李騰鵬

霍焰

弟炳

蕭應禎

姚慶

王建極

周一念

劉存備

趙邦智

趙巡

王顯仁

徐升階

張以興

孫永譽

李日茂

李日韓

李乾法

趙書

劉永昌

程道南

霍堂

鄭繼芳

姚泳

子同倫

姚廷棟

任明臣

邊維新

李懷瑜

侯守正

侯楹

姚思虔

王公弼

楊彤庭

胡時祥

張文桂

戴一心

某孝子

陳顧諱

李乾淑

秦四德

楊時蕃

鉉默

王家基

高世棟

張三省

趙洪籙

何遜

傅燧

王尙緒

劉宗良

高爾儼

高位

劉士彥

王文棟

戴明說

褚士奇

黃正邦

黃家棟

李思賢

周達仁

陳性

于廷陳

趙景皋

張茂華

孫瑋

曾鉉

蘇才美

宮繼蘭

朱用錦

高爾憲

陳應武

劉自然

杜依中

何陽春

李崇德

李震成
子瑛

劉世傑

倪維城

梅應文

王紹慶

張鎧

張海

倪鸞

王珠

梅應卜

張奉

劉孔安

楊圯

張情

賈文清

賈文清

向化

于乾

李昊

朱朝

王廷試

周斐

李桂蕃

李夢周

張汝官

呂詠

李治

李觀光

孫淪

王煥

王填

孫登俊

子弟

呂世祚

吳推已

王世顯

辛進孝

張朝棟

張永吉

張耀

劉仲仁

路建邦

劉才盛

許汝謙

王謨

趙獻廷

李騰蛟

子春早

鄭維倫

孫文安

劉其醇

馬世琦

胡藩

馮宗雍

張鵬翼

侯能

母紳

郭先生

侯儀

李昌

陳正言

董嘉善

董繼昌
董廷訓

蕭汝厚

李邦喬

子鳳來

陳壽

劉池

戴世德

呂養正

盛存仁

弟存義

劉夢

左懋第

張德政

李鐸

崔維嶽

武開基

馬汝淮

王世化

鄧煜

陳光大

趙思本

王巍

劉泮

楊粹夫

子州鶴

李華白

宗維章

侯堪

子幼鉉

明

蔡啟盛案序年應憑舉科明文其非由選舉者審時列入世濟其美則權輕重非堪別立即附合之惟一鄉之善絕無可資推尋始彙列於後此固無可疑者第既以舉科爲綱及鼎革之際或就後朝登科自應歸後雖有前科可弗復論惟以前朝科第而仕後朝則在後既無可屬初疑又不合與忠義並列於前繼思無俟褒貶而相形自見計亦良得因以膚敏祿將入於此卷至前志各志所載或

甚平常卽刪不錄非
復上卷之悉仍舊矣

卓敬字惟恭浙江瑞安人後徙滄州成洪武二十
一年進士拜給事中好直言或以太剛則折爲戒
曰吾諫職居其位則直其道苟直死不可回禍
福豈所計哉時諸王服飾與太子無辨敬乘閒言
曰朝廷則倣全在宮中今陛下於諸王不早辨等
威而使服飾與太子埒嫡庶相亂尊卑無序何以
令天下上笑曰爾言是朕慮不及此一日與同官
入奏適八十一人上命改爲元士尋以六科爲發
政本源又改爲源士尋復稱給事中敬歷宗人府

經歷進戶部侍郎建文初燕王來朝敬密奏曰燕王智慮絕人酷類先帝夫北平者強幹之地金元所由興也宜徙燕封江南以絕禍本夫萌而未動者幾也量時而爲者勢也勢非至勁莫能斷幾非至明莫能察上覽奏大驚爲袖入翼日語敬曰燕骨肉至親卿何得及此曰楊廣隋文非父子耶上默然良久曰卿休矣事竟寢太宗卽位執敬責以不迎及前奏裁諸王事敬厲聲曰若用敬言王安得至此太宗怒欲殺之而憐其才乃曰奸臣欲害朕敬止欲徙朕內地耳命繫獄姚廣孝以敬素不

見禮銜之乃曰昔吳王不殺范蠡而越卒沼吳王
衍不殺石勒而勒終斃衍陛下所藉爲重全在地
勢使敬言見用離北平直囊中物豈有今日哉上
猶使中官諭之堅不屈誅三族臨刑從容歎曰變
起宗親略無經畫敬死有餘罪矣神色凜然經日
猶如生太宗嘗曰國家養士三十年不負其君惟
得一卓敬敬有高世之才凡天文地理律厯兵刑
悉能察究詩文峭拔磊落有詩文五十餘卷又著
書發明周子通書邵子經世之學宣德閒門人黃
朝光作年譜行狀侍講劉球爲之傳私諡曰忠貞

傅維鱗

明書

國朝賜諡忠毅

勝朝殉節錄 俱新通志引 滄州志注按明史不言徙滄但舊志必非

無據仍之

案前志選舉既載而傳又入流寓本嫌兩岐故州志不復歸流寓但聲明之至通志并

無言矣茲著其歷變之迹

滄州祀鄉賢並祀忠義

甄寶字德輝慶雲人洪武二十六年鄉舉任汝甯

府同知歷官陝西四川布政使興學校勸農桑理

冤抑整軍經武民賴以安以平苗功賜劍玉加南

京兵部尙書曾輯邑志簡覈具有史才

前志

卒祀鄉

賢

縣志

王恭字克莊宋宰相沂之裔洪武丙子以邑庠生

授五軍稽禮司斷事判決詳明戊寅改大理評事
永樂初陞左寺副又陞右寺正四任大理疏沈滯
解疑枉乙酉陞蘇州府知府開倉振飢修隄防水
吳人翕然稱之調太原府赤心愛民聲溢兩郡甲
辰調漢陽府時長吏不得民心恭以正言匡之後
致仕歸百姓攀轅泣送不忍舍性孝自始仕至郡
守必奉母張偕行壽八十有七

據靜海縣志補

崔琰青縣人洪武時薦舉任知縣累官戶部郎
中命領工部檄同平江伯分巡河道清苦勤慎賜

白金二笏宣德九年致仕從祀鄉賢

前志引河間府志案祀

典名

炎

崔瑛青縣人永樂二年以功除武安知縣門無私

謁率民入山採木造廳食以己貲民愛戴之

前志

張景亮青縣人永樂初勅封善人

同上

王翱鹽山人先世農夫也至翱而刻苦學問中永

樂

辛卯舉人

十三年進士成祖定都北京欲得北士爲

重而開榜北士每後翱兩試皆高等上喜召見賜

之食改庶吉士授大理寺正以誼誤左遷行人宣

德元年以楊士奇薦陞監察御史十年陞僉都御

史鎮守江西移鎮松藩靖商巴之亂正統七年遼

東兵變勅翱提督明年陞右副都御史留撫之十四年以邊功遷左都御史景泰三年召還加太子太保會兩廣有蠻寇議置總督而難其人兵部尙書于謙曰非王翱不可遂以命之明年蠻平召還其年夏陞吏部尙書翱爲人剛明果斷外強中寬論事質確而亦善行其志其征四川番賊番酋有來降者翱出所賜金幣易牛酒犒賞之曰此吾行時上所陞賜天物也吾不敢用以賜汝等諸番皆悅盡邀他部來歸初至遼東總兵以下途謁翱數責其賊至不力戰曳出斬之皆搶地自伏請合願

死於是莫不盡力已出行邊高墻垣深溝塹自山海關直抵開原屯堡斥堠千里相望益簡卒伍賑貧窮偶配鰥寡凡詞訟無論輕重悉聽入贖雖至殺人亦許之曰償死罪無益死者家而財或足濟其用其他雜罪許其入贖足賑邊矣且夫邊民固不可以法一也以死救生未爲不可也翱前後貯金銀布帛穀粟物畜以數十萬邊計大充土皆騰飽樂戰進出塞破敵屢有膚功邊外嘗猝至下令堅壘伺怠擊之皆遁去近邊諸來款者去防老少男婦靡不畏威召還時諸番詣闕乞留及至總督

兩廣威望已著蠻夷聞翱來皆恐謝曰蠻夷撫捕
各有機宜今當安之耳引其酋長犒以金帛酒食
推誠撫諭歸順甚多爲吏部尙書黜陟精嚴關節
不到有一女嫁賈傑傑官畿內翱妻愛女數使迎
之傑固患不遣曰翁方長銓拔擢人加膝耳官我
京師女朝夕見母何待迎耶女言翱妻爲翱置酒
長跪翱大怒取案上器擊傷之出宿朝房卒不調
傑生平所引用文武大吏若施聚焦禮范信耿九
疇軒輓年富李秉程信皆適世用馬昂崔恭列位
六卿翱直名呼之英宗復辟李賢坐事黜補外任

翺力言賢才得復留內閣益見倚任上進退大臣
時時召翺便殿面質可否呼翺老王而不名天順
間曹欽反夜執李賢傷其首血流被面賢奔翺所
求救賊并執翺翺厲聲曰朝廷何負汝汝反耶殺
他人甯殺我賊謝曰豈敢殺長者遂上馬去賢乃
得免事聞加太子少保時年七十有八上老翺難
其代也憲宗卽位命雨雪免朝參仲孫以廕補國
子不使應試曰汝自有階毋妨寒士有中貴人遺
明珠數顆直可千金翺固辭不得則綴珠衣領間
居數年中貴死召猶子還之詔營地於鹽山有司

承媚多列屋若干翽曰非詔旨也悉拆去成化三年疾甚予告方輿疾出國門病革遂卒年八十四贈太保諡忠肅李文達稱之曰臯陶言九德王公有其五矣亂而敬擾而毅簡而廉剛而塞強而義

又曰王公凡慮事則無滲漏世稱信然

前志引
畿輔人物

志然性頗執嘗詔舉賢良方正經明行修及山林

隱逸士至者率下部試翽百不取一二性不喜南士英宗嘗言北人文雅不及南人顧質直雄偉緩急當得力翽由是益多引北人晚年徇中官郭聰囑爲都御史李秉所劾翽自引伏其名譽蓋不無

小損云子孫世官錦衣千戶

新通志引明史

彭時撰神道

碑在墓

縣志案縣祀鄉賢滄州亦未移去

馬昂字景高其先河南祥符人移籍滄州中永樂二十一年鄉試以會試下第入國子監宣德丙午授行在鴻臚寺序班正統丁巳用廷臣薦陞監察御史奉命整飭宣府大同偏頭關兵備及巡按陝西淮揚徽州等處所至有聲寬猛相濟不爲淵察癸亥陞刑部右侍郎改右副都御史參贊甘肅軍務日夕講求邊計謹斥堠明烽火築城設險聲勢聯絡先是赤斤蒙古罕東等衛番族心肆抄掠至

強劫總兵進貢馬駝昂受命率將士討之盡得主
名梟示及擒其僞祁王鎖南奔并妻子械送京師
自是番人不敢近邊矣已北虜寇甘州昂令人畜
悉入城堡簡精銳選騎射躬擐甲胄出屯山隘以
伺虜聞遁去西邊方倚爲長城而昂以乞疾忤旨
乃命致仕景泰庚午也甲戌兩廣夷寇擾攘起昂
總督兩廣軍務兼巡撫便宜行事昂乃大布朝廷
威德帥總兵方岳井土官兵民勦其爲暴害者生
致其僞將軍周鐵盛盤等獻闕下上遣行人勞以
綵幣寶鈔陞右都御史丙子征斗峒賊平轉左都

御史天順丁丑有不足昂者造謗上命致仕及入
見復留命之山西巡察邊境比還遂理院事戊寅
陞兵部尙書辛巳虜寇陝西勢甚急命懷甯伯孫
鏜爲總兵昂仍總督刻日出師是夕曹欽反昂與
鏜討之欽伏誅進太子少保仍掌兵事自是上寵
待特厚賞賚以金玉束帶繡金麒麟服其銀幣玩
器書畫禽鳥時鮮之賜歲無虛月衣有撒哈喇者
雖勳戚有不可得昂與賜焉屢召遊西苑南宮及
扈從校獵南海子一時進退廷臣亦必召昂咨訪
甲申憲宗嗣位信任益篤調戶部尙書尋奉敕同

右都御史林總給事中潘禮陳越按籍點軍士既畢乃分精銳者爲十二營以備調用又籍軍帥之賢否而黜陟之慮後事之違變而禁約之實皆出其議云戊子昂年七十時有災異謫見力求退避得俞旨賜敕榮之陞辭復賜燕饒并寶鈔若干既歸八年卒訃聞上嗟悼贈少保諡恭襄

前志引分省人物考

鄉賢案祀

胡欽字敬夫慶雲人知州槌子永樂十五年鄉舉任建安知縣巨寇鄧茂七據竹查山官兵擊之不克欽使人諭賊曰汝等皆良民脅於賊耳大兵且

重刊元朝通志卷之三 人物 三
至悔之不及能投順則赦仍免役一年賊五百騎
來降欽請於都御史張偕復爲良民賊首大懼復
招集亡命二萬餘圍建安索欽時兵部尙書金濂
領兵太監王瑾總兵官甯陽侯陳懋俱在圍中不
敢出召欽曰賊急索君奈何欽曰旣爲臣子焉敢
惜死遂乞精兵一千決戰顧其子灝曰宅內有井
爾子母守之不勝則投井死軍士聞之皆流涕欽
率衆出城力戰賊小却欽乘勢縱擊適都督劉得
新領兵至而陳懋亦督衆出交擊斬首數百茂七
中流矢死金濂大喜函茂七首奏聞賜織錦銀壺

金爵擢延平知府時正統十四年二月也尋擢陝

西參政與都御史馬中錫共修邊備有功歷遷四

川山西左布政使卓有清譽歿祀鄉賢

前志

趙昇滄州人正統六年蝗水相災野多飢殍昇捐

粟千石賑之有司以聞旌表義民

前志引州志案青縣志畧同

莫衷一是惟州祀義行而縣無

李瑄鹽山人知府庸孫由歲貢任平江知縣正統

中有司奏聞旌其門曰尙義其弟瑋字廷璧邑諸

生亦慷慨好義凡族黨親戚婚姻喪葬多所周給

眾爲勒石

縣志案祀義行又前志引河間府志作暄出粟五百石不言弟瑋

李琚字崇璧鹽山人天性孝友以弟子員充貢入太學卒業甫募擢戶部雲南司主事尋調廣東司正統甲子冬陞郎中復用薦進階奉議大夫凡卿貳有所商榷若國用之贏縮邊儲之豐耗與夫兵民之轉輸琚每從中贊之議論允當有裨於國計者甚多時河閒民有部運租稅者以白金若干遺家僮而道其姓名竟趨去琚走白卿貳召其人笞而還之生平清介大率類此

前志引分省人物考

李鉉琚子景泰四年鄉舉知平原縣事時旱潦頻仍民凋俗剝鉉公勤聰察剖決如流修葺壇壝公

署倉廩皆設法措置費不及民民懷吏畏以憂去

官後補山陽縣人仰之如召杜

縣志

王珣由舉人官夔州府知府節財愛民抑強扶弱

治績丕著人愛戴之歷久不衰

據鹽山縣志補

傅愷鹽山人景泰癸酉舉人初任松江府同知發

粟賑飢全活甚眾陞山東鹽運司同知

前志引河間府志

冀本鹽山人景泰中出粟千一百石賑饑戶部下

令有司爲立石紀其事

同上案
祀忠義

孫昂天津人中天順三年鄉試授高平縣知縣抵

任縣大祲昂矯發倉粟全活數萬人坐是落職人

咸惜之

前志引
衛志

劉葵鹽山人天順三年舉人任陝西武功縣治尙

整肅民敬畏之

縣志

孟虎慶雲人自幼孝友生元末歷年一百八歲溜

川高捷巡按河間聞之令縣以安車送至府問元

明間事言之甚悉加壽官命縣每年給穀二十石

歷八歲至成化初終今板達營孟氏皆其後

前志

强珍字廷貴滄州人

天順壬午舉人

成化二年進士除涇

縣知縣請減額賦民德之擢御史初遼東巡撫陳

鉞啟劄召敵敵至務爲蔽欺巡按御史王崇之劾

鉞鉞大怒謀之汪直誣逮崇之下詔獄輸贖調延安推官及直鉞用兵方論功而敵大入中官韋朗總兵官緄謙等匿不以聞珍往巡按請正鉞罪兵部尙書余子俊等奏鉞累犯重辟不當貸帝弗從未幾指揮王全等誘殺朶顏衛人珍發其狀全等俱獲罪直方自矜有大功聞珍疏怒適巡邊還鉞郊迎五十里訐珍誣已直益怒奏珍所劾皆妄詔遣錦衣千戶蕭聚往勘械赴京比至直先榜掠然後奏聞坐奏事不實當輸贖詔特謫戍遼東直敗復珍官致仕宏治初起山東副使擢大理少卿明

年以右僉都御史巡撫宣府時綏謙已罷珍奏留

謙才力可用給事中言謙數失機珍不應奏保遂

改南京右通政尋以母老乞休卒

新通志引明史案祀鄉賢前

志文未備

于鑑歲貢生補宣化府萬全都司經歷能贊畫戎

機英宗北幸竭誠盡力護蹕回京擢山東濟甯州

知州政聲卓著後英宗復辟加贈賜葬祭並御製

碑文

據靜海縣志補

王界鹽山人母亡廬墓三年

前志

成化戊子舉人

縣志

馬思聰字彥誠青縣人學醇行端天性孝友成化

甲午舉人授陽穀縣令有廉能名時張秋河決檄

令督工作堰功垂成以過勞瘁卒於工所百姓奔

哭失聲

前志引分省人物
考案祀鄉賢

蕭英字文俊青縣人成化

甲午舉人十四年進士授杭

州府推官陞太僕寺丞致仕歸不立崖岸優游桑

梓人多愛慕之從祀鄉賢

前志引河
閒府志

曹孜鹽山人成化丁酉科舉人初授河南修武縣

知縣蒞任平易多惠政遷陝西沔縣知縣

同上

徐廷錫字天祿號拙菴南皮人成化庚子舉人令

博興涉縣二縣俱有能名擢太僕寺丞尋遷南京

戶部主事監稅淮安慎於出納再遷郎中經理財賦纖細無遺爲大司農所嘉獎陞陝西參議歸居數月卒廷錫性耿介孝友著於家庭所在無不以

清正稱祀鄉賢曾孫升階

前志

張璿南皮人少奇穎工詩古文詞領成化十六年鄉薦任兩淮運副使致政家居潛心理學築草堂數椽教授生徒士林以橫渠先生目之祀鄉賢祠

子繡玉山簿忠碭山縣知縣

案名誤潘今據縣志正

張希達字周卿慶雲人任肥城縣知縣監察御史奏其守已恤民政行化理歸田後表正鄉閭修葺

縣志文學政事兼擅其美

俱同上
案祀鄉賢

馬政字公敏青縣人性穎悟博學能文登成化二

十三年進士授翰林院檢討歷興岷楚三府長史

見人過惡輒面斥之不少貸竟以峭直忤權貴致

政歸尋以疾卒詔進朝議大夫鄉邦咸思慕之

前志

引分省人物考

案祀鄉賢

蔣儀天津人宏治二年己酉舉人正德九年甲戌

進士

前志選舉

官至陝西按察司僉事居官清慎所至

人皆德之

縣志選舉注案
祀鄉賢故采補之

張時敘字九敘滄州人中宏治

壬子舉人

丙辰進士授

浙江青田縣甫下車卽修文廟伯溫祠縣猾吏刁
民革頑服化布按二司所批詞訟常無虛日一訊
立辨民呼爲張青天陞兵部職方司主事管山海
關到日卽興守備太監誓曰禦暴而不爲暴凡往
來客商聽其所之纖毫不染卒時城樓星落如斗
大其鐘自鳴至今青田山海士夫經過滄州者羅
拜墓旁

前志

鄭海天津左衛前所小旗以廬墓有感旌表其門

前志引衛志 案祀鄉賢並祀
孝弟新通志據明史在宏治間

張淮號寒泉南皮人幼時慮問見寡陋就學京師

業大進宏治甲子舉人正德戊辰成進士授戶部主事尋改監察御史簪筆觸邪嘗彈大司馬大中丞京兆尹不法事毫無顧忌士論壯之巡鹽兩淮按部中州所至惟旌廉退污刻弊抑強憲紀爲之肅清武宗嬖宦秦文者餽以厚幣力却之會上出畋諸大臣莫敢發言淮獨抗疏極諫致上震怒仍犯顏無懼色既還浙江憲副以禦逆甯功有白金文綺之賜嘉靖改元晉河南按察使稱明允丁艱歸遂卧里門數年卒

前志 案 祀鄉賢

張進德字敏之靜海廩生正德六年遭流賊之變

負父母避難天津偶失父出入戈矛間號泣求之
竟日乃得後居父喪哀毀骨立事母亦以孝聞母
欲得甘旨必曲意致之人比之杜巴郡云子簡自

有傳

縣志

張佑天津人正德

庚午舉人

庚辰進士除分縣知縣爲

政專以德化有爭訟者佑曲爲開喻且卧閣自責
不施鞭扑久之獄訟以息治行上聞欽取入爲御
史先是值歲饑不及奏請卽開倉以賑大吏賢而
釋之去之日百姓爭持牛酒相送至百里外有泣

下者

前志引
衛志

鄭氣字浩然靜海人正德

庚午舉人

九年進士授涇縣

知縣裁決如流報最民立生祠祀之陞監察御史

尋授河南按察司陞右布政尋轉陝西左布政使

方氣爲侍御時靜海地濶貴戚多侵占氣設方略

收復之又民間寄牧稱累氣白於當事減去七民

賴以蘇舊派役有青衣夫不勝擾害力爲邑侯言

罷之氣天性仁愛不遺故舊自治甚嚴而待人有

禮歿祀鄉賢祠

前志

張偉慶雲人任襄陵縣知縣厯官山西按察司僉

事興利剔弊所在有聲

同上

案正德癸

酉舉人祀鄉賢

楊應時慶雲人以掾吏爲山東顏神鎮巡檢俗好
鬪而健訟應時憚之以法作懲刁圖置有德望數
人爲保正分籍四民日考其業惡風以息懲惡少
葺孝婦祠設守塚弓兵以禁發掘其善政多類此
正德十四年春土賊王皋王相等作亂眾至數千
山左騷動應時焚香誓眾一鼓擒之餘孽匿山中
分兵窮搜次第翦除民爲建生祠太常卿張袞爲
立傳比之許樂陵云

縣志

王紳

嘉靖壬午舉人

己丑進士官右都御史正色立朝累

劾嚴嵩及總理直省鹽法疏通引目國課日裕竈

丁無苦公舉崇祀鄉賢

據州志補

王國賓字尙仁號雪海滄州人嘉靖元年舉人官
松江府通判尋罷歸常草創滄州志未成而卒從
姪緒子業號月川官縣丞以事掛冠里居與同邑
劉驥論及州志慨然曰子欲續先人之業而世方
貴耳賤目恐人微言輕是以逡巡未果曩日不然
公自幼與子同筆硯肆力文章以期大用奈命與
時違耳倘能纂修前書則可成一家言以俟百世
乃不朽之業也豈當以目前之鳴噪者爲進退哉
緒然之遂謝客居鄉墅踰歲稿成曩爲之序

滄州詩鈔

張問之字子審慶雲人嘉靖

王午舉人

癸未進士初授

行人轉司副嘗上疏諫章聖皇太后尊號見明倫

大典旋轉工部員外遷郎中奉命督造蘇州府花

磚工料廉以律已嚴以緝下工成力陳燒造艱辛

并繪爲圖畫貼說以進上嘉之酌增磚價審民獲

安爲立德政碑見崑山盧樞記後督建九廟皆有

績當上意擢湖廣參議轉四川按察司副使整飭

威茂等處簡練士馬聯絡埃墩斬龍洞諸羌數百

人上賜金帛以旌其功

縣志

逾三年乞歸又逾年以

疾卒

知縣張龍撰墓志

案祀鄉賢前志未備

陳燿字德孚靜海人嘉靖乙酉舉於鄉弱冠未婚
明年登進士升刑部員外郎中勘斷明決尙書唐
龍常謂諸司曰獄必經陳郎中手無枉縱也恤刑
河南數十年疑獄一語立剖老吏吐舌以神明呼
之太宰張孚敬兼經筵重燿文學令編進講語錄
燿多用諷諫語尋陞湖廣副使復除冀南兵備以
註誤謫萊州府同知復累陞山西督糧參政時邊
餉缺乏燿轉運有方不至告匱再陞河南按察使
政簡刑清會推大同巡撫僉都御史

前志

張愚天津人嘉靖

辛卯舉人

壬辰進士除戶部主事歷

陞都察院右副都御史賦性剛直蒞政明敏巡撫
延綏嚴飭戎務欽賜蟒玉以勞瘝卒官賜諭祭蔭

一子 前志引衛志
案祀鄉賢

李法字國儀鹽山邑弟子員挺叔夜之剛腸富元

龍之豪氣使在戰國不落孟嘗信陵下也 楊文卿
撰墓誌

楊文卿字鷗海鹽山人嘉靖辛卯科舉人初授稷

山縣令陞南京都察院經歷淹貫經史邃於詩學

邑初無志志自文卿始所著有鷗海集秣陵吟行

世前志案知縣許言詩撰
墓誌序述甚詳載在縣志

趙潤字陽岡鹽山人嘉靖辛卯科舉人累官衛輝

府通判與楊文卿同榜文譽亦相伯仲文卿嘗誦

袁淑謂謝莊之言曰江南無我卿當獨秀我若無

卿亦一時之傑蓋以其文名相埒也

同上 衆人
物名獨作淵

殆誤也茲從選
舉與縣志悉符

汪來天津人嘉靖

甲午舉人

辛丑進士授刑部主事陞

山西兵備副使居官嚴毅不避權貴豪姓聞風斂

跡罷官日不妄通竿牘冠蓋到門鍵戶不納日以

詩文自娛

前志 案
祀鄉賢

劉燾字仁甫號帶川原籍天津衛後徙滄州登嘉

靖

丁酉舉人

十七年進士

滄州詩鈔

除兵部主事在山海關

有功

浙江通志

果遷浙江副使

明史胡宗憲傳

時燾方居憂以

倭警廷臣薦之遂墨衰卽戎有乍浦王江涇諸捷

浙江通志

已而復大敗時嘉靖三十三年也

明史胡宗憲傳

尋遷福建巡撫倭寇福州燾令大開城門以入避難

者率死士千餘邀擊於閩安鎮手發矢斃三尊倭

大奔潰赴河死者無算凱旋之日士民歡迎曰此

真巡撫也無何以病免

福建通志

尋復以都御史巡按

遼東嘉靖四十三年土蠻入遼東燾上諸將守禦

功且言海水暴漲敵騎多沒者下有司祭告燾等

皆有賞

明史韃靼傳

尋授薊遼總督吏科都給事中王

治劾其不職

明史王治傳

御史凌儒復以永平失事劾

之遂貶官

明史凌儒傳

隆慶元年御史郝杰復劾其養

寇冒功遂還籍聽勘二年復以侍郎巡撫延綏甯

夏甘肅

明史王

尋授兩廣總督

幾輔人物考

遣潮州總

兵俞大猷會閩師夾擊海寇會一本一本遂被擒

明史李錫傳

熹應封侯以忤柄臣乃止

幾輔人物考

年近六

十卽上疏乞歸又二十八年卒賜葬祭有晴川餘

稿

滄州詩鈔

浙江

奏議若干卷行世

舊通志

俱新通志引又原注人物考原文言壽之失侯由
分宜阻之考一本之邊平在隆慶三年見明史穆
宗本紀距分宜之黜已七閱寒暑矣
分宜字蓋誤案前志引衛志甚略

陳松字子喬青縣人

嘉靖庚子舉人

登進士歷官河南道

監察御史湖廣按察司僉事廉直敢言遊宦幾三

十載生計蕭然雅好吟咏五七言近體尤爲卓絕

前志引河間府

志案祀鄉賢

湯殷南皮人父澄有善行嘗創建大悲閣於興化

寺殷由監生仕爲吳江丞廉幹有聲尋歸築室植

菊爲林泉怡樂之境遂號曰菊軒翁居鄉資人婚

喪遠邇皆高其義沒祀鄉賢子賓

前志

湯賓字繼寅號交川五歲時自向父前朗誦大學

康誥章父奇之已而隨侍吳江行道里二千所經

行山川郡邑水陸交際下極媿瑣一一能舉其詳
嘉靖二十九年成進士母病篤賓侍湯藥目不承
睫衣不解帶者踰月晝夜焚香籲天願以身代母
病霍然已人以爲孝感云初授安福知縣潔己愛
民劑量里甲平反疑獄保障流寇士民戴之越三
年轉戶部主事權崇文門稅巡通州草場轉邊鎮
糧餉督海安倉政所至以勤廉著聲尋轉員外郎
中知萊州府事一歲丁內艱服闋補常州府常爲
東吳劇郡巨室大猾陰持官府差繁賦重弊竇萬
端賓明以察之寬以劑之竟用治行高第擢湖廣

按察司副使兵備蘇松時當島夷兵燹之際賓外
捍海岸內安黎庶其時開府大吏不問人情徑裁
兵餉沿海無賴偶語市中謀鼓譟地方洶洶大吏
聞之倉皇無措賓立召幕下開誠告誡許以括帑
金爲餉而諸黨叩頭散去是年挑七府塘八里白
茅河百二十里度地程工其心獨苦先是賓父丞
吳江時曾濬白茅工未竟而賓卒成之庚午轉河
南按察使便道省親上九十壽鄉里爲榮辛未轉
湖廣右布政使無何進左癸酉擢撫治鄖陽右副
都御史賓領節抵鎮譏察山寇招撫流移軍政修

明地方甯謚俄以外艱歸幾不欲生至乙亥以中
讒言致仕介然素守萬厯十三年卒年七十有二
前志引分省人物
考案祀鄉賢

曹梅字龍洲庚子舉人由進士授戶部主事權京師商

稅於常數外羨餘俱進諸朝後遷南京戶部員外

權楊州稅羨餘亦進諸朝毫絲不染為一時廉能

之最政事之暇手不釋卷據鹽山縣志補案王
好問撰墓表載縣志

戴才字子需滄州人嘉靖癸卯舉人甲辰進士授行人

擢給事中庚戌秋邊烽達京師倉卒乏軍興戶部

請一切加諸通賦才抗疏言今畿輔山陝諸郡歲

苦兵騷驛不堪而復議增馬江南諸郡每先期輸
納料銀又豫輸機兵民快皆目前權宜之計而復
議增賦是竭澤而漁以重困民也下部竟格不行
累陞兵科都給事中南京太僕寺少卿其後以僉
都御史巡撫甘肅又以副都御史巡撫陝西又以
右都御史總督陝西三邊軍務才三蒞西邊諳練
其利弊墾荒田興水利簡兵將飭烽堠邊外諸羌
輒入輒遣創去朝廷倚爲長城而其績最著者中
衛南有裴家川地腴田可萬頃民苦邊騎不得田
作才相度地形築墻建堡疏於朝且請以固原守

備將兵營田以苑馬少卿兼僉事移靖虜整飭兵
餉而秦隴之間屹成巨鎮又俺答款關乞貢示報
可而吉能者俺答支屬也援例以請下才議才言
邊外東西各爲雄長授職宜均通貢宜隨俺酋盡
入爲便互市第可行之宜大不可槩陝西也時內
有重臣主其議者才拂之而不顧當其爭互市時
或有勸才稍徇貴人意者才正色曰市之利害譬
之熟矣徇下而謾上便身圖而不計國是有臣如
此將安用之卒不肯附和內意才旣去鎮卒開甘
肅之市令番夷交惡爲國家生一邊隙人歎才之

遠見及晉南本兵按江防緩急爲飭兵卒部屬方
略有巡鹽御史奏改浦子口五衛隸御史才抗疏
言南畿各衛分列六營以藩籬根本統領則以內
外守備巡視則以科道其來已久一旦改隸御史
使堂堂六師下同部伍非建制意也事遂寢人謂
才得大體萬厯丙戌卒年七十有三

前志引 畿輔人物志

案祀鄉賢

鄭金字伯純號龍川南皮人內行修潔研精周易
開絳帳以訓誨後學以行實爲先嘉靖

癸卯舉人 四十

四年成進士知平原縣均徭役禁淫祀奏績列上

考遷戶部主事督糧儲於德州事竣卒於家祀鄉

賢子登瀛能世其學訓導贛榆

前志

張謨字子顯南皮縣人璿曾孫有惡少酗酒無故
毀辱謨置不校鄰人侵謨田笑讓之拯貧助喪四
方咸佩其惠幼好學與弟謚同擅文譽子以旃仕
單縣知縣

張謚字子靜謨弟嘉靖

丙午舉人

丁未成進士任杭州

推官治獄明恕陞南京戶部主事歷員外郎中俱
以清理財賦見稱晉僉事備兵武定值盜蜂起謚
捕獲無遺遷山西右參議瀕行以贖緩萬餘金報

之撫按不入已橐人服其操抵甯武防禦有功陞陝西憲副規畫中窾時京營協理戎政缺廷議推謚副會忤於當路乞歸穆宗初以薦徵不起卒年

七十有九

俱同上 案祀鄉賢並祀忠義

張簡字易從靜海人

孝子進德子嘉靖戊午舉人

隆慶戊辰進

士補大同府推官以治行陞御史巡江右時分甯

清安閒多盜藪簡移檄勦之民賴以安旋移節中

州中州人德之如江右還奏適大計吏簡掌首道

條疏七事擢大理寺丞晉右少卿未幾爲言事者

所中遂歸簡脩

母偉貌幼時警敏強記於星厯卜

筮諸書靡不究覽著述半逸不傳

前志參縣志

殷尙質天津人嘉靖十四年襲指揮僉事掌衛事以勤能數被薦進都指揮僉事歷太原大同參將三十二年督軍解巡撫侯鉞圍擢遼東副總兵就近署都僉事充總兵官三十五年十月打來孫以十餘萬騎入廣甯尙質急率游擊間懋官等禦之塔兒山力屈而覆贈少保左都督諡忠愍廕子立

祠

前志案祀忠義又見宦績

戴佩號懷吾青縣人以舉人任河南林縣知縣清簡愛民致政歸民攀轅卧轍者千餘人無不涕泣

享年九十

同上

李騰鵬號槐亭南皮縣人少穎邁爲文奇麗橫溢變化百端隆慶丁卯舉於鄉七上公車不第親知勸之始仕潞安推官燭奸決獄咸稱明允遷鳳陽別駕委疏漕河殫厥心力以勞瘁卒於官鵬長於

詩詞善草書工點染所著有墨鳴集蛩鳴樂府

前志

引河間府志

所選故明詩統搜羅幾遍鑒別尤精海內

稱一代詞宗云曾創修南皮志已成而沒遂散軼

縣志

霍焰鹽山人知縣達曾孫由廩膳生援例初授府

軍左衛經歷陞西苑馬寺清平監監正居官興利
革弊以廉能稱條陳馬政十事朝議行其六致仕
歸推鄉飲大賓與弟炳續修縣志有跋前志引河
間府志
蕭應禎字以賢靜海人隆慶庚午舉人公車屢弗
售授常州別駕推鞠務得其平廉聲藉甚改開封
府嚴定稅額示於商曰吾不以禦暴而爲暴也年

七十七卒祀鄉賢

前志

姚慶字君錫青縣人以歲貢授陽曲縣訓導該縣
評其素行以爲清風霽漢宜爲百世之師尸祝明

禎允稱一鄉之善從祀鄉賢

同上 案縣志作曲
陽訓導與祀典合又

雍正十一年祀忠義子
孫同倫同祀俱有傳

王建極鹽山人
生員德用子隆慶元年十五歲

父故廬墓三年官表其門
縣志案前志略

周一念靜海人
隆慶閒以孝旌
新通志引明史

劉存備滄州人
隆慶閒道拾大戶段氏金五十兩

仍招而還之
段欲與分固不肯受
前志引河閒府志案祀忠義

趙邦智鹽山人
常有事輩華拾遺金酒肆中託故

久稽俟其人至還之
又有同鄉人李進孝者偶失

其金於智楊閒翼日持還
其家生平崇儉黜華兢

兢守禮壽至百十有二歲
同上案祀義行

趙巡鹽山縣人垂髫時父邦智爲里長某誣攀侵糧逮獄拷比體無完膚初巡隨兄等避居樂陵聞父受比瀕危挺然詣縣願以身代途遇母憐其幼挽之南行巡誓與母訣曰兒不復求生矣至縣代父出獄備嘗艱苦後遇赦獲免

前志

王顯仁萬厯

丙子舉人

庚辰進士都御史紳孫也累官

吏部文選司員外條議銓法除授無壅滯遷山東按察司副使剔奸弊興屯田善政尤著以積俸給諸弟置產又修義宅以棲族人施義塚以惠鄉里

據州志補

案祀孝義

徐升階字叔泰號麗台廷錫曾孫弱冠舉於鄉才
名藉甚工詩善奕鼓琴習射各臻其妙屢因禮部
試始就選授高密縣遷守岢嵐俱著政績著有麗

台詩集邑志略

據南皮
縣志補

張以興字伯起號四菴道人南皮人十七廩於庠
喜讀書經史而外靡所不窺詩文兼長萬厯癸未
卒年四十二著有四菴文集十二卷李槐亭爲之
序孫永譽字印白傳家學以明經授保甯府經歷
所著有雨花齋松影樓醉餘搜異諸集曾孫曉字

睢之永譽長子中丙子副榜

前志

李日茂號培吾青縣人萬曆

乙酉舉人

十四年進士初

令修武尋調武陟寬和撫民而馭吏胥甚嚴莅修武僅三月卽以才見武陟瀕沁併受黃不時潰決行河使議捍以石隄疏且報可茂持之甚力曰沁固流沙善崩不能載石也何徒糜金錢而罷民力爲必欲竟此役者甯以不仕罷去擢御史會內旨三王並封一二抗疏如朱維京王如堅等皆削迹去日茂慨然曰是當以死爭何問竄逐乃約同志公疏諫復單疏極諫

議輔人物考

略曰本月二十六日

接見聖諭朕所生三皇子長幼自有定序但思祖

訓立嫡之條因此少遲冊立以待皇后生子今皇
長子及皇第三子俱已長成皇第五子雖在弱質
欲暫一並封王以待將來有嫡立嫡無嫡立長爾
禮部便擇日具議承行欽此該臣朱維京王如堅
疏請仍建儲位致干聖怒俱發極邊永遠充軍二
十九日隨奉聖旨著都爲民免成夫我朝列聖建
儲多矣未聞有待嫡者皇上特緩冊立以待皇后
生子又謂後日有嫡立嫡無嫡立長其於夫婦父
子之情曲而盡矣朱維京王如堅始雖遣戍卽蒙
免之其待臣下之恩抑又渥矣似無可言者顧念

一時之舉動弗慎他日之禍機潛伏臣不忍見陛下之啟亂萌塞言路也敢昧死爲皇上陳之夫禮謹大宗服重長子士庶猶然況天子乎且太子天子根本與王侯世襲大不相侔故自古聖君必早建立彼豈不知嫡之可待哉蓋前慮宗社之爲重後慮禍亂之當防也此經常之大典非一時之權宜卽我朝列聖亦豈皆未稽聖訓乎蓋恐猶豫之端一開後世習以爲常奸人得以藉口定策國老之禍不獨見於唐耳矧聖訓首云凡朝廷無皇子必兄終弟及須立嫡母所生者庶母所生雖長不

得立明指入承大統若世宗者言也豈朝廷有皇子必欲待嫡之謂哉今既有皇子而並立爲王自附於無皇子之訓無論名分混淆主器莫屬大信不昭厲階復生臣恐於朝廷之體統亦既褻矣天下後世將謂之何聖祖垂訓子孫爲正綱常別名分防竊亂大哉聖言如見聖祖者矣聖祖豈爲後世開一竊亂之門哉英睿如皇上昭著如聖諭雖一時不果他日誰敢有異志但此端一開繼世因之爲訓勢之所至將有不至以幼僭長不止者臣言而不中臣誠私憂過計於宗社固無害也設不

幸而言中使宗社有不測之憂皇上貽啟釁之誚
臣萬萬死不瞑目也況十餘年來以建儲請者不
知凡幾皇上批答亦不知凡幾曾無待嫡一言二
十一年冊立之旨昭如日星朝野臣民方外諸國
誰不知之一旦改爲並封卽大小諸臣且不免於
駭疑矣彼無知小民蠢爾遐甸卽人給一諭臣不
敢謂其信也不信民弗從恐峻法禁之而疑滋甚
上下交疑從未有能治而不亂者皇上甯不爲社
稷憂哉見今數日以來大學士王錫爵有疑其依
違者矣司禮監太監張誠有疑其爲把持者矣夫

錫爵自處不後於常人非申時行比也兼程而來
豈爲調停固寵之計張誠雖有物議自謂不肯汚
名者與田義輩大相徑庭亦豈肯遺臭萬年哉但
恐欽奉聖諭一時倉卒不暇遠慮致有此誤事方
未成猶可救正倘遂致不可解焉在皇上固無成
心彼二臣者雖一日去乎其位恐亦無辭於天下
矣科部諸臣累疏著遵新旨臣業已知之何敢瀆
擾但事關宗社安危臣不敢謂諸臣已言而姑已
之亦不敢謂姑從之而俟後日之復爭也匡救者
臣子之責將順者臣子之願皇上惓惓念及皇后

諸臣豈喪心病狂者而不一順之念皇上所居之位祖宗之位也東宮之立爲祖宗立也皇上臨御二十年來不可不早爲社稷計而皇后一身上承宗廟者臣諒皇后之心必不忍以未然之嫡而虛宗社之託亦必不忍令已長之元子而就並封之列也甯獨皇后爲然兩宮聖母當亦有不安於心者矣況人心卽天意建儲分封禮臣之職也該部堂屬言之再四豈徒畏人言哉慮其失職而無當於人心也甯獨宗伯爲然部院大臣當亦必有不安於心者矣夫社稷至計臣不敢謂一言能決皇

上何不內請命於聖母合謀於皇后外會議於諸大臣乃嘗試漫爲之哉且人情莫不欲生亦孰不有父母妻子之屬又孰不樂就綰佩之列誠恐遂以爲訓異日宗社安危所係故不忍以此易彼耳未見嫡而立長何嫌之有陛下待嫡分封信無可疑顧元子無分封之條東宮無久虛之理科寺兩臣言雖不免太激而無非忠君愛國之所發也伏乞陛下上念祖宗付託之重下諒臣民屬望之殷前遵列聖早建之謨後防子孫陵替之漸昭今昔之大信杜奸宄之窺伺敕令文武大臣會議仍立

皇長子於東宮以重社稷封皇三子皇五子於藩
服以資屏翰朱維京王如堅諒其無他仍復原職
或因其激迫量加罰治庶人心不搖亂萌可杜而
宗社鞏苞桑之固矣臣愚竊不識忌諱恃有赤心
惟皇上爲宗社遠慮少垂納焉臣無任隕越待命
之至時萬曆二十一年正月三十日也縣志皆不報
又奏記首輔賁以大義首輔因上章引咎事遂寢
父病侍湯藥四載無閒晨昏居喪茹飧粥外寢杖
而後起服闋諸臺使爭勸之出皆堅辭之婚喪禴
祀一秉文公家禮歲時伏臘必齋戒灌獻合族會

食族子弟貧不能具脩脯爲延塾師宗人不能給朝夕爲賑義穀任東海嘗曰李憲副生平孝友著於家矣經濟著於官矣施恩利賴著於宗族鄉黨矣然止覺其蘊藉淵涵尙未罄其用也豈可以一長一善名之也哉

畿輔人物考 俱新通志引
案祖鄉賢前志未載原疏

李曰韓青縣人以恩貢授甯國通判剛斷有才凡州縣逋賦必委往催卽行輸納緝黃山大盜武功可紀三署劇邑皆有奇績陞沁州知州卒於官居鄉時人多家其周給有維則錄行世

前志

李乾法青縣人曰韓子廩生慷慨好義崇禎己卯

城守捐粟三百石闔邑稱之

同上案韓字疑韓之謄

趙書字爾讀由貢生任湖廣新化縣知縣蒞任慈

明剛毅歸里後自奉儉樸嚴於庭訓子八人一登

賢書餘皆有文名

據鹽山縣志補

劉永昌鹽山萬厯丁酉舉人有義行常遵父遺命

捐田三百畝作義田濟闔族婚喪又以四十畝作

社田爲義館師生薪水之費康熙五年祀鄉賢

前志

引有通志案列鼎革後今易

程道南字雪門先五世自中州遷畿陽道南補邑

弟子員戊午歲薦入成均已未銓除廬州通判聽

訟得情攝無爲州所至有聲辛酉中蜚語罷歸卒

於崇禎壬申趙洪籙撰墓誌

據鹽山縣志補

霍堂字遜所鹽山人邑庠生力學篤行與程道南

劉永昌唱和著作甚富後僅存什一云

前志

鄭繼芳字環樞鹽山人萬曆二十六年進上知淄

川縣見諸少年挾眾搥人於市曰長吏在卽毆而

當不可詣吏自言耶趨呼大杖杖搥人者并使荷

三木以徇於縣有中貴人治礦東國張甚撫按劾

之不報繼芳旣爲言金不生淄民逃且盡復多方

馴之淄患以紆觀返爲教三十五事言淄利害甚

悉調益都行取御史巡按浙江有錢塘人傅時藉
宦官勢冒潁國公子孫授職百戶豪富不仁繼芳
劾罷之置諸法

縣志

姚泳青縣廩生富而好義萬厯閒值歲歉捐粟千
石濟貧民全活甚衆又山東奇荒流民載道養粥
救濟三閱月活流民萬餘人施學田十頃以贍貧
士立有碑記子同倫光祿寺署丞性慷慨好義二

次鄉飲大賓

前志案
祀忠義

姚廷棟青縣人戚黨待以舉火者無算歲祲莊佃
疫死者十數棟悉給之槥有貧不能聚婚者棟伙

助之無少吝子登科焚券千金

同上案
祀忠義

任明臣號東海青縣人萬厯庚子舉人性至孝兩
遭親喪不飲酒茹葷各三年建祠奉先一準古禮
經史百家及當代掌故無不研究尤好獎掖後進
狷介自矢計偕未嘗干謁鄉里有大利害屬當興
釐則弗以躡迹自嫌若解戶審編甲保撥驛馬不
啻痼瘕在身務期得請邑有草場不任耒耜而賦
重原田復力陳當道減賦之半青人嘖嘖稱誦之
授雄縣教諭卻諸生賀儀會新進士釋奠之儀計
二百餘金門人輩固請乃置學田恤婚喪新殿廡

毫不私之卒之日雄士人爲之心喪青人尤甚因

以鄉賢名宦祀兩邑焉

新通志引 案前志略 物考 幾輔人

邊維新字鉉鑑靜海人性耿介有節操萬厯二十

八年舉人授鞏縣知縣庭無冤獄野無追呼鞏人

戴之後擢邠州知州以痼疾告歸時要人欲致之

爲聲援畝以大用不應每謂諸子曰予欲使汝輩

爲清白吏子孫冰山安可恃乎祀鞏縣名宦祠

前志

李懷瑜鹽山人萬厯丙子舉人父炤卒哀毀盡禮

事母王氏備極歡養事寡嫂甚恭視孤姪猶子

前志

引河間

府志

侯守正字廷觀號平泉南皮人七歲喪母哀毀踰
禮事兩繼母皆無間言迨父歿哀慟之聲不忍聞
奉庶母爲慈親歿服齊衰三年撫異母兩少弟俱
成名守正幼聰穎爲文奇麗年十四入太學所交
悉名流卒業而歸以高隱終

前志 案 祀孝弟

侯楹字子木號渤海守正子潛心理學一時名士
俱從之遊萬厯癸卯鄉薦仕東鹿學博遷黔南司
理不就歸隱今是亭觴咏其中自號抱甕子年七
十五卒鄉諡曰貞靖祀鄉賢子煒薦明經

姚思虞字元遜青縣人以舉人授蘭陽縣知縣值

流寇屢犯會嚴斃渠魁孤城保全鄰封有大疑獄
上臺每命覆訊咸服明決撫軍李某以思虞博學
能文委修兩河文獻志尋陞臨洮府同知

俱同上
案祀

忠義

王公弼字直卿號梅和父歿母史氏守節弼方幼
卽善體母志萬厯丙辰進士授營繕司主事陞虞
衡司員外癸亥出知甯國府以敦土風善民俗議
蠲職爲先務復通楚羅設鼓鑄以佐其匱乏丙寅
觀察懷甯璫勢方熾公弼毅然不動在嶽甯時黃
山商吳養春家難構養春弟僕附璫興大獄璫旨

遣部使者往籍其產株累數千家弼力爭得豁贖
數十萬徼民以安已加右轄會豫寇甚張設新勇
營括屬邑協糧裁壯役溢糗者充餉省里派復以
計擒渠散脅事皆平乙亥後楚氛益熾漕兌鱗次
江干弼曰艤舟齎盜糧非策也乃題留漕米八千
石佐緩急未幾賊果由廬江犯桐城諸路後潛山
太湖楓香驛之戰卒以有備得無患忌者顧以留
漕中之丙子鐫補靖遠參議已卯調東昌憲副值
大饑奸民藉以爲亂發粟賑之所活以百萬計鄆
城濮州王鳳集等處相繼奏捷而東阿盜李澤亦

就擒朝議謂弼有軍旅才有二東撫軍之命弼撫
戢軍民益摯蠲賑疏凡九上民困少蘇巨寇李青
山諸孽跳梁日甚鎮臣方以請撫養癰弼逆其必
變欲以剿易撫未十月而青山果叛賴弼預爲布
置得大創於張秋汶上閒俘青山闕下賜廩幣有
加忌者又以撫鎮不和解弼任癸未起補大銀臺
方赴召值閩逆犯京師不果行

國朝定鼎補原職乙酉陞戶部右侍郎旋轉左時以
津撫招撫事波及後覆驗無狀遂奉母以歸卒於
家弼性和易逝之日推財散姻戚貽訓誠後人所

著有景慶堂文選詩選兵樞樂府等集行世康熙

五年崇祀鄉賢

州志

楊彤庭字廷榆鹽山人萬厯乙卯科舉人初任磁

州知州累官陝西鄜州副使

國初隨撫江南加官右參議博學能詩著有內院清

咏非遊草秦闡唱和蘇門紀遊諸集華亭陳眉公

金壇蔣楚珍爲之序

前志引河
閒府志

胡時祥字季卿慶雲人讀書每至達旦文章高邁

見者偉之父沒哀毀骨立中萬厯乙卯舉人欲就

一職供菽水會魏璫亂政母曰尹母有言吾知汝

以善養不知以祿養也遂止母病躬侍湯藥數年
如一日疾劇禱於神求以身代母卒杜門謝客同
榜輩居臺垣負重望者欲時祥一見不可得山東

張潑稱爲第一流人物

前志

張文桂號培我淮曾孫事親備色養親有舉動先
意承志萬厯癸丑歲大禋一日從父郊行道旁有
遺殣慘然心動卽承父意率家僮瘞之衆嘆其克

成父德孝行類如此

據南皮縣志補案祀孝義

戴一心號冰壺青縣人萬厯二十六年選貢高才

博學青士半出其門

前志

某孝子遺姓名青縣人萬厯三十七年大水鄉民乘船入市至城東北隅暴風船覆溺死者十八人孝子已登岸見無其父號呼投水而死三日抱父屍浮出而同舟俱死竟無識者

同上

陳顧諱字濱瀛鹽山人萬厯年貢生任陝西宜川令性剛毅愛民有治聲郡守稱爲卽墨大夫後被誣贓離任士民醵金完其累始得歸後任趙時雍爲作義助引其首曰義助者何宜民向義爲濱瀛陳公助也何助乎陳公曩公令宜有治聲乃以強項蒙辜斯民求雪其冤不得故相與輸貲以代贖

之也

縣志

李乾淑字清仲青縣人天啟辛酉恩貢十二歲就童子試輒冠軍左學使光斗極器賞之著有白華

詩稿

前志

秦四德號育所興濟縣人以歲貢授松溪縣訓導先是松溪脫科三十載四德增建尊經閣敬一亭移魁星樓工竣隨有中式者時巨宦子弟越例出貢四德執法不阿閩縣懾服崇祀名宦陞鹽城教諭纂修四書會解印心集刊行鄉飲五次

前志引河閩府

志

案

祀鄉賢

楊時蕃滄州人庠生生平孝友急公好義萬厯三十八年捨粥賑饑全活甚衆如立義社以廣來學建義田以贍宗族凡婚喪嫁娶各有補助至修橋以便往來起道以通行人瘞葬以澤枯骨善事不可枚舉鄉人德之

前志案祀忠義

鉉默字中象靜海人萬厯

戊午舉人

已未進士任河南

懷慶府推官行取吏科給事中朱幾以不附逆璫回籍崇禎時復起爲吏科給事中時有巨奸陳雲漢假名屯田增賦害民合縣束手無策默獨經畫多方以紓其害勞怨不恤士民尸祝厯太常旋推

河南巡撫會流賊由均州犯河內默率左良玉湯九州李卑鄧圯兵待境上復率九州乘雪夜薄吳城賊營大破之嵩雒以北名城數十賊避勿敢攻總督陝西山西河南湖廣四川軍務陳奇瑜旣失李自成於車箱峽默自汝州移駐盧氏檄良玉九州各陳兵守要害得稍甯者數月當是時賊勢張良玉等承督師檄守備尙固默率諸將斬獲多賊多趨秦楚境已分爲三自潁州犯鳳陽皇陵中州所在告急八年夏默被逮去久之得釋歸八年卒

公舉崇祀鄉賢

前志參明史

王家基滄州人萬厯四十六年解元魏忠賢擅政
欲招致門下家基正色拒之入都會試忠賢又曲
意相招家基又力拒之自是隱約食貧終身不試
別業在城南新縣鎮北人呼之曰解元莊

前志
案列鼎

革後今易又新通志前
後重出與下劉夢相同

高世棟字隆吉舉人與弟世楨同登萬厯戊午京
兆試崇禎十一年戊寅冬東兵圍城世棟世楨約
眾守城除夕城破兄弟同罵求死世棟三子長燦
廩生次煒燿皆庠生見父叔殉難亦同殉節一門

忠孝人欽重之

據南皮
縣志補

張三省南皮人邑庠生事親孝親疾寢食俱廢祈
以身代居河濱嘗見有小地若病狀詢之乃舟中
被劫而毆死者稍蘇遂養之壯而資遣還鄉其行
事類如此子如玉庠生能世其學孫茂華崇禎癸

酉舉人

前志案
祀孝弟

趙洪籙字濛初鹽山人知縣書子天啟辛酉科舉
人少有文譽能四體書父病焚香籲天願以身代

士林重之

前志引河
間府志

何遜字東閣興濟縣人甲子舉人戊辰甲戌副榜
授文水縣知縣時飛蝗入境遜令百姓預修撲具

至期畢集蝗竟撲滅是年大有人服其神明行取
工部虞衡司主事逆閹陷京師與子錫路死之

案祀

鄉賢

傅燧鹽山人好善樂施睦族和鄰萬厯四十三年
邑大饑凡親知不給者有所貸施之無倦歲豐不

責其償遇乞食者設方爲救全活甚多後以耆德

舉鄉飲二次邑侯表其閭曰年高德邵

前志引河間府志

王尙緒鹽山人萬厯四十三年大饑出粟煮粥濟
貧歲餘粟爲之空崇禎十三年又饑復施粥三月
就食者眾粥不給量給以錢有餓死者率僕佃瘞

之案祀忠義

劉宗良鹽山人性好施予天啟三年天津道王弘

祖表其墓曰明義叟慶吾劉君之墓

俱同上案祀忠義

高爾儼字中孚靜海人萬厯丁酉舉人崇禎進士及第授翰林院編修入

國朝累遷吏部尙書弘文院大學士爾儼秉銓四載奉公守法時論歸之所著有西銘衍義孝經釋略諸書卒

贈少保諡文端

前志

高位字抑之鹽山天啟丁卯科舉人在山西汾陽

縣知縣以父艱歸里凡公務有益於邑者輒身任之

國朝三舉鄉飲大賓

同上

劉士彥字振藻家貧燃薪而讀登賢書崇建望樹鎮社學延師訓蒙邑侯張士儁嘉其義製文爲記

已卯被兵死之時論惜焉

據鹽山縣志補

王文棟字幹石

天啟丁卯舉人

崇禎進士入

國朝授江南山陽知縣時軍需旁午文棟勤敏精詳諸務立辦淮水決田三千餘頃產去糧存文棟力爲陳請得豁免有浙來弁帥過以陣獲幼女相贈

受而歸於其父後調知山東萊蕪知縣卒祀鄉賢

前志 歷宦數年未嘗爲子孫營益尺土著有介性堂

文稿詩集

縣志

戴明說字道默尙書才會孫

天啟丁卯舉人

崇禎七年進

士歷戶部陝西司主事吏兵二科給事中凡朝政

民瘼疏凡十餘上多人所不敢言都城陷奉母旋

里

國朝復兵科都給事中歷太常寺少卿正卿戶部左

右侍郎晉都察院右都御史緣事謫河南布政司

參政分守汝南道兵燹之餘僅存遺子明說請蠲

餉銀四千兩草豆二萬餘禁私罰恤水災請河夫
嚴保甲盜戢民蘇時鎮兵多駐宛協勦鄖襄寇明
說威信竝著諸將各戒所部無擾督撫交章推薦
譽望益隆遂擢廣西右布政使內升刑部右侍郎
卽轉左俄拜戶部尙書時國用匱乏有爲練餉之
議者明說曰此前朝弊政也力持之遂格毋喪還
里適滄州舊欠狐皮等銀八千兩有檄追徵明說
曰我司計時已邀免此胡來者力爭巡撫前得停
河間通屬霑惠者數萬家初明說書京城憫忠寺
額列前銜忌者援劾落職嗣又遭父喪遂終於家

明說達於學術既罷官往詣容城孫徵君奇逢門
受業遣二妾歸嫁自治身心益篤實敬慎從之遊
者甚衆稱爲定園先生生平著作甚富詩畫尤有
名

世祖皇帝賞銀印一方文曰米芾畫禪烟巒如覲明說克

傳圖章用錫云卒年七十二子五王綸王縉最知

名

州志案
前志畧

褚士奇字伯常號斗華別號津南笠叟鹽山人崇
禎戊辰選貢性純孝倜儻有大志保舉府通判

國朝定鼎檄催謁銓以養親辭授通判終不就多義

行著有家訓及窗杖諸銘泰山關里遊覽記等篇

前志參縣志 案

列鼎革後今易

黃正邦號繼軒南皮人性穎異七歲就傳通大義
精書法十三而孤家貧兩弟幼母湯日爾讀書固
吾志然誰爲我謀朝夕因廢學躬耕以奉甘旨常
將張公藝九世同居勉諸弟母歿共爨三十餘年
終無閒言子家棟崇禎庚午舉人孫得煇進士得

煜副榜

前志

黃家棟字衛宸崇禎庚午舉於鄉上春官不第遂
絕意仕進潛心理學負笈者濟濟焉年七十猶能

燈下作蠅頭楷書好學不倦操守端嚴宅心醇粹

鄉謚曰修道先生著有四書非非集大易約解等

書子得焜甲辰進士得煜壬子副榜

據縣志補案職官載鼎

革攝知本縣事此傳不及

李思賢江西南昌人賈於滄寓焉援例授光祿寺

署正滄州有貧不能葬者施棺瘞之每歲寒卽施

棉衣崇禎四年守禦百戶吳之屏監造盛甲違式

繫獄思賢爲捐銀改造完官十三年大饑復捐資

千餘金賑濟全活饑民甚眾

前志案祀義行

周達仁紹興人行鹽占籍滄州崇禎十三年饑捐

資買米救活萬人遇公事輒代貧者攤賠閒償之

不受咸稱周義士壽七十一歲

案祀義行

陳性字益之浙江人籍於滄少事詩書博聞強識
爲人有豪俠氣能急人難而無吝惜竭力事親無
懈志待兄弟姊妹曲盡手足之誼遇事急公倡義

常在人先考授府經歷

俱同上

于廷陳字惺涵鹽山人崇禎庚午舉人任山西猗
氏縣知縣癸未冬流寇臨城竭力守禦城垂陷懸

印於堂衣冠泣拜自經死

前志引河間府志

趙景皋字知安號贊揚孝子巡孫幼有至性家貧

母手自操作景皋從鄉塾歸輒代以爲常父出雖
夜分必讀書俟之受知於推官禹好善崇禎三年
舉於鄉好善以御史按山東有富人張姓者或誣
殺人罪當死人持千金挽景皋景皋察其冤馳往
救之一錢不受土寇起知縣問賊賊法於景皋全
活無算幼喜讀大洞內景諸篇後悟其非著有性
學易簡原道篇龔倫傳關鍵論秀實說於五經四
子多所發明云康熙二十四年卒年八十
韓莢撰墓誌
案新通志先見其祖傳末鼎革後又重出今易

張茂華字鄧林南皮人癸酉舉人

國初圈地後恆產無存坦然安之有司折節敬禮恆

以病辭後讀哀江南賦感愴旋卒

縣志

孫瑋字佩之鹽山人崇禎癸酉舉人

案選舉姓張

天資

英敏未弱冠登賢書中明通榜者三

國朝定鼎隱居不仕

縣志

曾鉉字鳴陞推官繼志曾孫選貢生性度和平學

行兼優己卯被兵舉家罹害闔邑惜之

據鹽山縣志補

蘇才美字瑤圃鹽山人崇禎九年舉人任山東日

照縣知縣振興文教捐俸濟饑士民均感卒於官

前志

宮繼蘭字鶯鄰靜海人性至孝於學無所不究崇
禎丁丑進士除工部都水司主事視河夏陽首倡
築城卒如所議推固原道參議尋出守兗州府府
爲藩封地二十七州縣錢糧四十餘萬侵欠莫稽
繼蘭以城守爲先力嚴保甲每立一法親貴莫敢
撓清出舊欠二百六十三萬有奇民賴以蘇以母
老乞歸家居旋起羅定兵備道不赴年八十卒祀

兗州名宦祠

同上

朱用錦滄州人崇禎丁丑進士上省刑八議初任

泰安州蒞政嚴明病請回籍

前志

值東兵犯畿輔破

名城如拉朽用錦激勵義勇守滄州城竟獲安新通

志引庚辰歲大饑用錦出資遠糴煮粥賑貧輔人物考

崔苻無警更修築滄州城不費官帑不擾民貲甫

四旬而工竣遂以勞瘝殞身沒之日郡人罷春停

市前志引河間府志案祀鄉賢忠義

高爾憲字中章號闇公爾儼弟讀書數行俱下尤

敏於文崇禎己卯舉人

國朝選授垣曲令歷官戶部郎中據前志補

陳應武河間忠順營都司陞保定府遊擊未抵任

崇禎十二年東兵攻任邱應武防守死難見府志

據南皮縣志補案前志
未列人物僅見選舉之末

劉自然學務經濟慷慨有卓識萬厯閒流寇嘯聚
共推爲團練長自然糾集鄉兵率衆於望樹鎮西
築土城一所置近村男婦其中而親扞衛焉未幾
賊果大集自然設計禦之擒其渠魁賊請千金贖
之不許賊衆遂潰地方得安至今人呼爲劉新城

云據鹽山
縣志補

杜依中字遜公號致虛靜海諸生嘗叩關陳書獻
十七策皆關天下大計利害鑿鑿懷宗嗟異手署
紙尾曰賈陸重生欲大用之爲當途所阻甲申後

縱情邱壑

國初召用遺才以疾力辭者三竟不應著有雨花詩

集徐秉義撰序

新通志案列
鼎革後今易

何陽春興濟人賦性醇篤庠士半出其門下授清

豐訓導陞泗州學正卓有師模有四書膚說行世

及聞國變衣冠望闕泣拜尋以憂死

前志引河
間府志

李崇德舉人歷戶部員外郎以城破殉難贈恤見

明史

據青縣
志補

李震成字霖久滄州人工詩文善書家貧事親必
備甘脆友愛諸弟常共處一室田宅悉讓之崇禎

壬午解元癸未登進士

國初授聞喜令全活香山堡民千餘戶旋以部郎督學河南六年又備兵陝西漢中所至有聲子瑛字仲球蔭入太學博覽羣書父子有煉月齋抱甕書

屋集若干卷

前志

劉世傑字起亭號祚萬幼嗜學篤於孝友年十七母歿父繼故哀毀盡禮家益貧潛心力學領壬午鄉薦癸未進士時年二十八初任兵部主事

國朝晉陝西隴右道忤當事降知河南陝州陝人勒碑頌之崇祀名宦政聞擢刑部員外轉郎中恤刑

江南多所平反陞山東沂州兵河道旋被誣歸時

年始四旬至庚辰卒壽八十有五

州志

倪維城天津衛生員少孤事寡母陳氏備極孝養

學院霍某疏請旌表樹坊

前志引衛志 案祀鄉賢並祀孝義獻徵詩注

言坊址在東大街費家衛衙口

梅應文天津人弟應元任山東濟南府遊擊時值

流寇擾亂應文尋弟濟南為寇所執代弟死

案祀忠義

孝弟徵獻詩注言應文以武舉官羅文峪守備後追封鎮國將軍入祀忠義祠

王紹慶天津衛生員弟廷慶以非事罹獄紹慶憫

其無嗣乞以身代苦歷三木後逢赦得免卒年七

十九俱同上
案祀鄉賢

張鎧天津衛指揮張鏞之弟代兄死繫獄遇赦得

免

前志引河間府志
案下俱未祀

張海天津人性孝友母范氏死廬於墓側號泣不

離終三年始歸

前志引
衛志

倪驚天津人事父母及後母皆孝有姑寡而貧驚

奉養以終其節里人陳邦政死驚爲之殯李萬寶

鬻女償官鏹銀落於道驚拾而訪還之

王珠天津人聰敏博學事親孝尤樂施予有急難

告者必傾橐以應鄉黨翕然稱之

俱同上

梅應卜禮部尙書守成子庠生父廕不仕

國朝數徵不起母卒絕食死子開運字際公貢生痛

父殉節終其身不苟葦洞魏裔介李蔚魏象樞推

爲畿輔巨儒子璋亦以孝名

新通志 案此不知何本下有聯合更覺

不倫今因關係大節錄之而易置明季

張奉青縣諸生性至孝父卒哀毀骨立祭葬以禮

廬於墓側三載以孝行旌門

前志引河間府志又原注按青縣志奉作

俸

案下俱未祀止有賈文清卻又祀於鄉賢

劉孔安青縣人諸生自幼孝出天性年十八父病

親嘗湯藥及卒負土築墳廬墓三年

同上

楊圮青縣人父先歿母亦繼卒葬畢就塚側略成
草舍終日茹素朝夕進香增土其塚遂高如邱陵
後有田數畝獨爲耕斂衣食自給三年不受妻子
之養

前志引
舊通志

張情青縣諸生父亡廬墓三年手植青楊成林有
烏鳥鳴其上行者側然名爲孝烏

前志引河
間府志

賈文清青縣諸生母張氏故躬自負土築墳廬於
墓側三年有慈烏馴繞之異

前志

賈文清青縣人性行醇篤居貧修志慕古力學母
故饘粥不入口樵悴骨立鄉大夫力勸節哀但唯

唯泣謝竟不變及葬廬於墓側三年間負土築墓

高若邱陵屆禪方歸

同上

向化靜海人父上爲衛指揮坐罪憤極投海死化

求屍不得亦投海忽上屍浮出衣服盡脫頃之雷

雨驟作首頂父衣浮之一處衆皆駭異收葬之

前志

引舊通志案前志孝友止此一人卻未入祀而下八人均祀孝弟辯又見後

于乾高唐州訓導性孝謹親歿廬墓三年

據靜海縣志補

李昊親歿廬墓三年培塚如山遺址在縣城北

朱朝性最孝家貧無以供菽水常爲人傭工所得

卽以奉親親或有恙不食則亦憂慮不食親歿廬

墓三年朝夕哭奠築墳如山

王廷試世居辛口里家貧事親孝親歿廬墓三年
後河決被衝廷試徬徨號泣竭力改葬復廬墓三
年

周斐邑廩生父母卒哀毀骨立廬於墓側三年時
有燕烏玉兔之瑞撫按疏請爲建孝子坊

李桂蕃邑廩生克諧繼母昆弟族里無閒言

李夢周邑廩生居家孝友處鄉忠信未嘗有厲言
傲色後失偶歷三十餘年義不再娶

張汝官邑庠生事親孝父歿哀泣盡禮旣葬廬墓

三年俱同上

呂詠滄州庠生孝行純篤生養死葬克盡心力事
孀孀撫孤姪內外無閒言明季寇亂任捍禦孤城
獨全又念賦役不均力遏儒紳優免之請滄人德

之前志引舊通志案在此與
祀典鄉賢孝義頗不相應

李治滄州人苑馬寺監正親亡廬墓六年前志
案祀孝

弟與下八
人並同

李觀光滄州人右通政以父亡廬墓三年運使邢
某扁曰孝子後廬母墓因致疾卒巡按于某旌曰
純孝格天

孫淪滄州廩生孝事繼母友撫幼弟學使周旌

王煥滄州生員入表孀萱三釜承歡學使周旌

王填滄州生員性孝友有產悉讓於弟里人以佛

呼之後因母故哀毀過節未及服闋以疾終

孫登俊滄州庠生年十三母郭氏故廬墓三年俱

上案運使旌曰孝性天植州志案兩志俱入俊誤浚鼎革後茲據祀典正

于弟滄州人廬墓孝子前志

呂世祚滄州庠生以弟早故遺幼子希契六歲教

養成名弟所遺家產代爲經理及長歸之纖毫不

遺學使袁鯨舉德行旌賞同上

吳推己字恕我南皮人父巍然官廣文推己性至孝母疾篤七日不食籲天願以身代遂愈後母柩在殯亂兵至眾皆逃匿推己哭於柩旁不去兵至欲焚之泣曰甯殺我勿焚母兵憐而釋之邑令林學會表其廬子維哲順治辛卯科舉人

前志案此祀孝悌

下皆未祀

王世顯南皮人事親孝親歿哀慕不已廬於墓側事聞兩院咸有粟帛之賜

同上

辛進孝南皮人歲荒母久病乃割股以進母病旋

愈

前志引河間府志

張朝棟字文峯謚孫也邑廩生工書法族子弟或才而貧資給之使就學重氣誼常出千金脫故人

子於難

前志 案子永清傳在鼎革後

張永吉字還白謚曾孫父早歿時切哀慕事母極孝遇時物非奉母不敢食教弟成立養妹終身學

使廉知嘉獎之以明經終

案縣志吉誤作昌

張耀字燦然南皮人父邁痲疾朝夕侍奉三年無怠家產悉畀異母弟己雖貧弗一言

劉仲仁南皮人母死廬墓絕迹不入家室

俱同上

路建邦鹽山生員年五十父故寢處草土如禮朝

夕哭奠必盡哀終喪骨立如柴後母病篤永夜露

禱母病果瘥

前志引河間府志
祀孝弟下俱未祀

案

劉才盛鹽山人母張氏孀居病思肉家貧不能得
割股啖之母病卽愈

許汝謙字六吉鹽山人性至孝能養親志有司三
旌其閭任齊東縣訓導公正自持不徇不屈陞學
正

王謨鹽山人庠生忠肅公黜後父死哀毀骨立幾
不能生畢葬事廬墓三年知縣陳準廉知延至公
堂以鼓樂花幣導途歸兼表其閭

趙獻廷字効明鹽山庠生早失怙奉寡母祁氏備
極色養母病焚香封肉籲天請代母尋愈後五年
母卒殯葬如禮廬墓三年里黨稱之

俱同上

李騰蛟字震俱鹽山廩生篤學力行攜子春早館
滄州時道經父墓去來必哭春早字毓先庠生性
亦純孝廬墓三載母七旬沒幾至滅性明末世亂
當路欲保薦之堅謝不出己卯城破殘殺甚衆春

早倡衆收埋之

縣志

鄭惟倫鹽山人事母劉氏孝母未食者不敢食母
卒哀毀過禮及葬乃穴處於墓者三年又於墓旁

種瓜以施路人

前志引舊通志又原注縣志倫作儒

孫文安某縣人流寓鹽山力農養親父早死事母

姜極孝母歿既葬廬墓三年

前志引鹽山縣志一案今縣志於鼎革後

出此人母子姓名事迹俱同但稍加詳而不言流寓並沒卻前志舊縣志尤輕易蔑棄之失也今仍舊

劉其醇字凝白慶雲人自幼性最孝母張病祈禱

減算及卒擗踊長號絕而復蘇父沒如之學使獎

其孝終廩生

前志案祀孝弟明代止此人

馬世琦字寰珍慶雲人邑廩生剛毅有操守性孝

友幼失恃事父孝養曲至及卒殯葬皆循古禮奉

繼母朱同於所生子孕秀授州同

胡蕃字翼明慶雲人邑庠廩生性孝友痛父蚤沒
事母曲盡孝養兄弟同居家貧所得廩餼不以自
私盡給於弟奉母甘旨鄉閭重之俱同上

馮宗雍天津人性純謹好義急公每多善行歲饑
盡出家中積穀以賑賴以全活者甚多又捐地築
礮臺不受值當事義之前志引
衛志

張鵬翼天津人樂善不倦曾倡義捐金修築郭外
礮臺天津衛城歲久荒圯鵬翼復捐甄灰葺而新

之前

志

侯能天津人家饒於貲性慈仁有偷兒入其室所盜無算爲僕所獲能命釋之且予以千錢偷兒愧悔卒爲善士

母紳天津人好施予閭里待以舉火者甚衆生平無疾言遽色接人有禮交稱長者

俱同上

郭先生天津左衛人賣藥爲業博極經史江右有蔡生者流寓天津雅與郭善蔡病且死無子囊有四百金密屬郭郭義不受乃強之郭聞蔡妻有遺腹因受蔡金居五月而蔡妻舉一子比子五歲矣郭出金告以故而還之其封識宛然

前志引河
間府志

侯儀天津人貢生除山西臨晉縣縣丞居官清廉

去任後民爲立祠祀之

前志引
衛志

李昌興濟人任三原縣知縣廉介剛正陞甘州兵

備道致仕家居布衣蔬食處之裕如

前志

陳正言興濟人副榜任清平縣知縣陞隰州知州

補大同府南路通判興濟田地賦稅多爲奸民蠹

壞正言條陳當事悉爲革正士民德之

前志引河
間府志

董嘉善董繼昌靜海人俱諸生五世同居百口共

爨慈孝恭友之風溢於閭里

同上案州縣志惟
靜海最劣此門尤倒

亂不可究詰初稿先爲所誤祀典刊成致復刪改
蓋賴其錄呈縣册祀位尙能周詳如前向化以下

入孝子與此下四義士皆資以辨別爲明人也然亦有不可盡信者向化與此均見前志而反不祀又別出董廷訓董廷講其行與此二董大同且言明時俱封兵馬皆見府志縣志今考之又無一相應則不解其與此二董爲同爲異矣二董與下四人俱祀忠義孝弟

蕭汝厚世爲邑之名族少遊黌序施穀濟賑多所全活捐貲修學宮

李邦喬立心仁恕順道安貧壽八十餘歲人稱爲靜樂先生其子鳳來邑增生濟父之美不隕家聲學者稱爲忠惠先生孫枝長遵守庭訓中順治戊戌進士

陳壽質行好義有遺五十金者壽得之竟還其人

又施義塚掩骼埋骨

劉池太醫院吏輕財好義孝養二親時論多之俱同

戴世德滄州人加太僕寺少卿文華殿中書居鄉
儉而能施庚辰辛巳歲大荒捐銀五千平糶全活
甚眾境人德之爲建積善生祠於北關郡守羅燝

額其門曰山高水長

前志 案
祀忠義

呂養正字寬吾滄州人善施予遇貧不克葬者捐
資以濟之至修橋梁道路竭力樂輸每助婚娶有

古義士風

同上

盛存仁滄州人與弟存義並以勇敢著明季流寇犯州官吏士民羣推進士朱用錦主城守事存仁兄弟輔之賊營三里莊男女求入避者數千或恐賊隨入莫辨議不納存仁曰某領鄉勇出陣公等坐門閒招民入保無患從之民入而賊不敢犯存仁始緩轡歸存義夜縋城下置礮繫束香於藥信蔽以陰陽瓦賊近觸其機礮發被傷遂潰月餘復至圍盧家院卽今戴家園時已築壕塹二層借礮一尊賊至率衆持兵繞巡置礮莊門外雜以轆轤頭賊遙望莫辨不敢近持數日賊結聚遂礮擊之見奔

追殺自此州城無警莊民安堵眾欲上其功堅辭

而止

州志

劉夢原名佚字無逸晚一名夢傷號患骨別號蓺

落道人滄州人

滄州詩鈔

崇禎閒諸生博覽經史善篆

隸草書兼繪事摹刻詩悲涼有騷音隱居不仕妻

亡不再娶二女通翰墨亦早卒惟一僕與共藜藿

宴如也順治甲午夏夢卧病有數卒排闥入辱之

遂自縊所著有昨非今妄集暨五車韻瑞補等書

新通志引州志原注按編修

印章十二頁每頁左方皆自署款識起崇禎庚辰

迄鼎革後則但書甲子蓋淵明詩意也爰列之明

末案此可見爲黃太史特筆固可仍之顧未刪

鼎革後滄州首名之複不檢若此則王家基杜
依中褚士奇梅應卜之不解隅反更無責矣

左懋第號蘿石山東萊陽人邑令之楨姪嘗隨之
楨任及登第服官每過必低徊不忍去後以奉使

殉義著聞海內

前志

張德政字平子號侑盤武林人能詩善草書客遊

南皮遂卜居焉仕南通州州判卒於官

前志引列朝詩集小

傳

李鐸鹽山人歲凶輸粟八百石濟饑因授以河閒

衛百戶

前志引河閒府志

崔維嶽鹽山人富而好義常欲助貧死無棺具者

百家俾匠張養成董其事數年畢願以貨與質庫
賈人五百兩賈遭變死輒焚券不復問

武開基鹽山蘇基鎮人己卯之變難民接踵不得
食遂斃前途基出粟二百石錢二百千煮粥食之
仍量給少錢佐其行乞之窮有病傷及婦女不能
前則設法歸之凡五閱月而畢

馬汝淮字誠菴慶雲人樂施予明中葉間七月終
霜殺禾淮積蕎麥數石霜後盡播於地鄉老勸曰
以時計之必不能熟留此麥可活數口淮曰活數
口不若活數家及麥長寸餘支鼎於野刈麥煮之

曬乾堆垛來春大飢鄉鄰乏食者施糠一斗麥菜一筐支給三月餘賴以全活者甚眾

俱同上

王世化字風寰慶雲諸生好義樂施己卯之難掩暴骨數百鄉人義之子任韓拔貢次任歐庠生及

孫烝耀竝補學官弟子人云埋齒之報

前志

鄧煜字含黎慶雲拔貢事親孝博聞強記樂周濟明末掩暴骨數百人晚年施醫藥以南華自娛

陳光大號忍菴慶雲人以貢釋褐授河南祥符縣判簿當途者嘉之五載轉東平州判官監司廉其賢命攝汶上陽穀鄆曹等縣有惠政隨例遷慶府

審理七十五歲終鄉里重之

案祀鄉賢

趙思本字宗源慶雲人任東安知縣勸課農桑優

濟貧乏民至今思之

案祀鄉賢

王巍字冲斗慶雲人歷任永平棗強學博教士以

德行爲先文章期於實用直指薦之巍見時事漸

非告休家居八十餘終邑人稱抱道先生子祚熙

歲貢

案祀鄉賢

劉泮號龍泉靜海人少有大志厭章句專心聖賢

之學發明經旨特出獨見其書足備一子壯歲始

貢成均任陳留興縣兩邑正直如其所學有方寤

集行世

案此明貢生兩志選舉所同而縣志儒林此傳入近人中既違前志且誤後人

楊粹夫號月川慶雲人平居動必以禮甘淡泊恥

奔競造就邑士半於鄉校授玉田縣訓導以行誼

風勵士風丕振卒於官門人私諡曰靖節先生

案祀

鄉賢子州鶴字友松知天長縣持正不阿體恤民隱

長於詩賦所著有天長志八卷慶雲志十卷

李華白字含芳慶雲庠生事繼母孝異母弟放曠

破產畀以厚貲餘義行尙多曾孫長興大昌俱領

鄉薦

俱同上 案其曾孫舉在雍正則此必明季前志未覈耳

宗維章字錦衷忠樸純篤以詩書自娛授定興訓

導七日而裁遂絕意仕進閉戶十餘年足跡未嘗

履街市邑人重之

據廣雲縣志補
崇祀鄉賢

侯堪字大受守正曾孫事親孝性聰敏讀書一覽
無遺詩文典麗雄偉有貽清堂稿書法遒健舉明
經司訓鄒鄒壽六十六卒子幼鉉著有蘭竹居詩
草與堪詩合爲一集幼鉉由拔貢歷官嚴州府同
知以清勤著聲

據前
志補

卷四十二終